

Di Meja Kita

Telah sampai ke meja kita tiga naskah buku-buku, kepada pengirmnya masing-masing kami ucapkan terima kasih.

(1) Bernama “Pendidikan Budi Pekerti”

bertulis rumi, tebalnya lebih 200 muka, karangan al-Ustaz Ahmad Sonhadji Mohamad, diterbitkan oleh *al-Maktab al-Tijārī al-Sharqī* berharga \$3.00 senaskah.

Buku ini baharu sahaja terbit pada bulan Jun yang lalu, ini mengikut kata penerbitnya adalah merupakan kumpulan ceramah-ceramah radio yang disiarkan oleh “Suara Singapura” sebanyak 59 siri dalam dua penggal.

Buku yang kami terima ini ialah penggal yang pertama, dan tentunya akan menyusul pula penggal yang kedua.

Kami dapati sajak dari bentuk, kandungan dan tekniknya semuanya amat menarik hati, dan dapat diketengahkan sebagai buku yang bernilai. Kerana selain mengandungi petunjuk-petunjuk budi yang baik ada pula dilengkapi dengan beberapa potong ayat dan hadith, contoh dan cerita dan diberi pula bergambar supaya lebih berkesan lagi isinya tertanam di dalam hati setiap yang menatapnya.

Kami yakin setelah membacanya, bolehlah diharapkan buku ini menjadi pembimbing yang baik kepada setiap yang membacanya, di samping menambahkan lagi pengetahuan tentang

hukum agama yang berkisar di sekeliling tingkah laku seseorang dalam kehidupannya sehari-hari.

(2) Bernama “Falsafah Seni Dalam Islam”

karangan al-Ustaz Budiman Rudi, diterbitkan oleh Pustaka Aman Press, Kota Bharu Kelantan, tebalnya 57 muka, diterbitkan pada bulan April yang lalu.

Melihat kepada nama buku tersebut segera kita mengerti tentang soal yang dikupasnya, tetapi kupasan pengarang tersebut berdasarkan falsafah Islam yang garis besarnya berkisar dalam soal: seni untuk seni, seni untuk masyarakat dan seni untuk taqwa, sebagai hasil (mengikut kata pengarangnya) dari ceramahnya kepada pelajar-pelajar Tingkatan Atas “*Ma’ahad al-Ehya Asshariff*” Gunung Semanggol, sewaktu beliau mengajar di sana, lalu dibukukan dalam buku ini.

(3) Bernama “*Al-Nahwū al-‘Arabī*” penggal pertama

susunan al-Ustaz Syed Muhammad bin ‘Alwi al-’Idrus² (Mudir Madrasah alJunied al-Islamiah, Singapura) sebuah buku berbahasa Arab yang mengandungi pelajaran-pelajaran Nahu Arab yang disertakan dengan contoh-contoh membuat *i’rab* dan latihan-latihannya. Tebalnya lebih 50 muka, berharga \$1.20 senaskah, diterbitkan oleh *al-Maktab al-Tijārī as-Sharqī* Singapura.

Buku tersebut sesuai untuk mengajarkan pelajaran Nahu Arab di sekolah-sekolah yang menggunakan bahasa pengatarnya bahasa Arab di tingkatan *al-Ibtidā’iyah*.

¹ sumber <http://www.arkib.gov.my/ma-ahad-al-ehya-asshariff-gunung-semanggol1>

² Sumber <http://ibnyahya.com/1969/syed-muhammad-bin-alwi-al-idrus/>